

T2726.2/1923

(11)

98

大明英宗睿皇帝實錄卷之九十八

正統七年十一月丁巳朔文武群臣太師英國公  
張輔等上

大行太皇太后尊謚議前一日鴻臚寺官於西角門  
設謚議案是日早

上纓服御西角門捧謚議官素服立於階之東文武  
官素服詣丹墀行四拜禮禮部奏進

尊謚議班首稍前捧謚議官以謚議授班首班首受  
之由中道進至

御前贊進

尊謚議

上興詣案北立班首進謚議文于案跪百官皆跪其  
文曰禮部尚書臣胡濙等奏欽蒙制諭命臣等會  
同文武群臣議上

大行太皇太后尊謚臣等謹欽遵會同公侯伯師保  
五府六部都察院等衙門官太師英國公臣張輔  
等議擬呈進臣聞自古

天命聖人君主天下必有聖后弘佐理之功以共保  
洪業佑啓子孫亦必有鴻名顯號光華無極至公  
之典載在簡冊萬世攸同伏惟

大行太皇太后端一誠莊含弘光大德本性成動循  
禮度是以

上天錫命作配

仁祖嚴養祭之禮克孝克誠躬相成之道克勤克敬  
表正六宮母儀四海有螽斯樛木之美有關雉麟  
趾之化懿德日茂慶澤淵深乃有

聖子宣宗皇帝祗奉宗祧克崇化理洪熙宣德之間  
丕昭輔佑之績迨今

皇上臨御允惟繼述之重益隆保佑之勤切切憂民  
孜孜保國大綱大紀載維載持舉措悉由於至公

分毫不假於私戚德如春布義如秋肅庶政清於上萬物遂於下仰稽前代維周之太任太姒足以齊稱若漢之明德宋之宣仁未足多也是以升遐之日慟切臣民無間遠邇臣等謹合輿論考之禮文依宋宣仁聖烈太皇太后故事宜

天錫之曰

誠孝恭肅明德弘仁順天啓聖太皇太后臣輔等拜  
手稽首謹議

上覽畢以付翰林院官命撰謚冊文徹案

上復坐班首及百官皆俯伏興復位再行四拜禮○

欽天監進正統八年大統曆○朝鮮國王李禔遣陪臣鄭中倣奉表貢方物賀

萬壽聖節賜綵幣等物○兵部尚書徐晞等六科給事中十三道監察御史交章論鎮守遼東總兵官都督僉事曹義右叅將都指揮同知劉端再失軍機法當逮治以正典刑

上曰所論義等誠當但已令記罪勦賊矣都察院其仍封奏章示之○雲南維摩州奏土民海輕等生拗其該徵秋糧等件不肯辦納累經招撫愈肆猖獗

上命總兵官都督沐昂及雲南三司官宣布朝廷恩威諭以利害禍福以化服之如果執迷調官軍勦捕仍會同總督軍務兵部尚書靖遠伯王驥詳議行之○夜五鼓西南天鳴有聲如風水相薄○戊午祀武成王太公望於後軍都督府初中府西北有廟祀武成王以下十三人至是新建五府於大明門之右遂營廟於後府祀之○陝西岷州大崇教等寺國師沙加等獻鍍金佛像古銅塔舍利及馬賜之綵幣○夜西北天鳴有聲如瀉水五鼓有流星大如雞彈色赤有光出翼宿入土司空尾跡

炸散○己未夜東南方天鳴有聲如瀉水○庚申

上

大行太皇太后尊謚前一日設冊案寶案于

几筵前左右置冊寶輿香亭于奉天門置冊寶于輿

中至日遣官告

天地

宗廟

社稷畢

上纓服御奉天門內侍官舉輿

上隨輿後降階升輅百官素服於金水橋南北向立

冊寶輿至百官皆跪俟其過乃輿隨至思善門外  
北向立

上至仁壽宮門外降輅冊寶輿由中門進至  
几筵殿前

上由左門入至丹墀內贊官唱執事官各司其事導  
引官導

上至丹陛上拜位捧冊寶官於輿內捧冊寶由殿中  
門入至

几筵前左右北向立內贊贊四拜禮親王陪拜在外  
鴻臚寺官傳唱百官皆四拜

上由殿左門入至

神御前跪百官皆跪捧冊官以冊跪進於

上左

上受冊以授捧冊官置于案捧寶官以寶跪進于

上左

上受寶以授捧寶官置于案奏宣冊宣冊官跪于

上左宣

大行太皇太后謚冊文曰孝孫嗣皇帝臣

謹再拜稽首言臣聞

宗廟之禮式致敬於本原功德之高必崇薦於稱號

惟君與后萬世攸同欽惟

皇祖妣大行太皇太后至聖之德作配

仁祖至孝之行格于神明儀範著美於六宮恩惠覃  
霑於九族誕育

宣考嗣履帝位至明至公用毗大政逮及眇躬兼隆  
教育弘示敬

天法

祖之道歷導制治保邦之規仁如春行義如秋肅攷  
攷一志惟在恤民以奠

宗社以保萬邦是以遐升之日遠邇興哀允惟盛德

大功宜薦徽號用咨輿議請命于

天謹奉冊寶上尊謚曰

誠孝恭肅明德弘仁順天啓聖太皇太后伏惟

聖靈昭明在天弘佑我後永篤其慶宣訖奏宣寶宣

寶官跪于

上左宣

大行太皇太后謚寶文曰

誠孝恭肅明德弘仁順天啓聖太皇太后之寶宣訖

奏俯伏興平身傳贊百官同奏復位

上由殿左門出至拜位奏四拜傳百官同導引官導

上至

几筵前奏初獻禮奏跪傳贊百官皆跪奏獻帛獻酒  
贊讀祝讀畢奏亞獻禮奏獻酒奏終獻禮奏獻酒  
奏俯伏興傳贊百官俯伏興平身奏復位

上由殿左門出至拜位奏四拜傳贊百官同祭畢

上由左門入至

神御前以冊寶授內侍官捧入內遂導

上親入內安冊寶行叩頭禮

上由左門出至丹陛上奏禮畢○雲南都指揮同知

李福領兵捕蒲賊妄以所戮從賊當賊首雲南按

察司請正其罪

上置不問但命都察院移文示之○辛酉叅贊甘肅

軍務都察院右僉都御史程富奏舊制守城軍給

冬衣布花下屯者不給今陝西屯軍調甘肅備禦

不給布花彼將何取給乞照守城事例給與

上曰甘肅極邊之地備禦又役之重者有司其即給

之母吝○湖廣武昌府奏本府社稷壇濱大江比

者江岸坍塌壇場因壞請俟農閑率工修築從之

○直隸揚州府泰州奏今年四月至七月不雨繼

又大風驟雨晝夜不息晚田俱被滄沒乞命所司



覆視從之○旦西北方天鳴有聲如風水相薄夜  
有流星大如杯色青白有光出天苑東南行至天  
園○壬戌賜通政司右叅議龔全安誥命封其父  
母及妻近例京官九載滿方許給授全安始歷三  
載請給

上特從之○建刑部都察院大理寺於宣武街西詹  
事府于玉河東隄○巡按福建監察御史張淑劾  
奏福建巡視銀冶按察司僉事李實不嚴督兵備  
致盜五百餘人竊銀礦因而劫殺居民甚衆請寘  
于法從之○癸亥以上

太皇太后尊謚詔告天下曰朕以藐孤嗣

祖宗大位仰荷

大行太皇太后聖德啓迪維持用寧國家以暨于天  
下於今八年不幸奄棄哀慕無極上薦徽號厥有  
彝章爰命禮官稽古典集群議公論僉允已昭告

天地

宗廟

社稷恭上

尊謚曰

誠孝恭肅明德弘仁順天啓聖太皇太后布告中外

咸使聞知是日百官各具素服烏紗帽黑角帶於承天門外行禮開讀○迤北瓦剌脫脫不花王及也先太師使臣卯失刺等二千三百二人來朝貢馬二千五百三十七匹宴賜如例○陞建州左衛正千戶奴忽為指揮僉事授頭目隔千帖木為所鎮撫○工部右侍郎楊青卒命有司治葬事○福建都指揮同知孫安為所部指揮奏其貪婪不法數事都察院請下巡按御史先收諸所連者鞫狀果及安具聞請逮

上命即執安鞫之○甲子四川播州宣慰司并廣西

龍英州遣長官楊鎮等貢馬○克默而河衛指揮喃哈右城衛指揮牙郎加赤斤蒙古衛都指揮都兒即等遣指揮把丹等貢馬駝方物賜綵幣等物○命故中都留守司都指揮僉事徐文子瑛襲為指揮使燕山前衛指揮使孫茂子福府軍衛指揮使董全叔和府軍左衛指揮同知傅得子安金吾左衛指揮僉事婁哈刺子得俱襲職老疾金吾右衛指揮使張福子瑛濟陽衛指揮同知臧成子倫羽林右衛指揮僉事吳麟子智江淮衛指揮僉事張勝子全俱代職○乙丑陞禮部主事陳奎為工

部郎中專理濟寧等處河渠南京戶部主事趙悌  
為工部郎中俱以秩滿九載故也○陞兀者衛都  
指揮使刺哈為都督僉事指揮僉事莽加為指揮  
同知賜之勅曰近者邊將獲到犯邊賊寇二名供  
稱隨爾刺塔搶劫義州等處而爾適到開原報說  
賊情鎮守等官拘送來京對理朝廷與爾辯明已  
將賊徒監候處決重念爾克紹爾祖父之志忠順  
朝廷幾為小人所陷特陞爾今職及賞賜衣服命  
還本衛管事爾宜益效忠勤撫輯人民安處邊境  
仍揆捕節次犯邊賊解京或遇各處犯邊賊竭力

擒殺朝廷賞功之典必不爾吝爾其欽承之○命  
都察院右僉都御史王翱往遼東提督軍務以遼  
東邊備廢弛胡虜數入為寇故也○勅遼東總兵  
官都督僉事曹義等曰近者兀良哈要結女直野  
人入境剽掠此賊多有受我官職及賞賚者朝廷  
以其向化聽於近邊牧獵而彼乃因以為非爾等  
又皆姑息偷安致彼縱橫出沒如蹈無人之境失  
機損威如國計何論爾等罪皆不可宥今姑曲法  
貸之命僉都御史王翱往取爾等死罪招狀就令  
提督整飭邊務此賊孤恩悖德神人共怒尚其同

心協謀設法挨捕以寧邊境毋以私廢公毋以小妨大毋縱目前以貽後患期於成功以贖前罪○陝西按察司副使郭原奏慶王秩燿以修樂遊園舊廟故即城南園置酒與長史紀善等官周弘等雜坐連日宴飲且令樂妓為戲軍民人等聚觀者數百人

上曰長史紀善職輔導王乃爾狂縱不檢在法宜罪姑記之都察院其移文示弘等令改過再不檢不宥○丙寅增置直隸鳳陽府潁州同知一員先是以州人戶不滿二十里止設正官及幕官至是通

政司右叅議王錫言土著及客戶寄籍者日以繁盛宜增官管理故命增之○宣府左衛軍有為胡寇所掠脫歸者夜越猫山寨邊牆以入鎮守薊州永平等處總兵官都督同知王或劾指揮李海等守備不嚴

上命巡按御史責海死罪狀罰俸半年○丁卯萬壽聖節遣官祭

長陵

獻陵

景陵

上以有喪服免文武百官賀禮○戊辰冬至節遣官  
祭

長陵

獻陵

景陵

上免文武百官賀禮先期禮部言

聖節既不受賀冬至宜令百官易淺淡冠服行五拜  
禮以盡臣子之敬

上不許仍御西角門○己巳復除陝西右叅政柴璉  
於湖廣布政司雲南按察司副使陳質於湖廣按

